

# VAR MARO

## An Autrou Le Gonidec,

AR GWELLA GWIZIEK EL LANGACH BREZONEC.

VA c'halon zo dizec'het, va zeod stag ouz va staon,  
 Ne red em speret nemet sonjesonou a gaon.  
 Hon mestr, sioaz! zo er bez.... Ra deuyo an douar  
 Da veza skànv d'e gorf paour, mar emâ e pouar.

Ne mâ mui hor c'henvroad, an Autrou GONIDEC,  
 Pini voa ker gwiziek el langach Brezonec!....  
 An daouzec a vis here e rente e ene,  
 Goude pemp mis a gouzanv, etre daouarn Doue.

Nebeut voa anavezet gant ar bobl eus hor bro;  
 Hogen tud gwiziek a Vreiz en e lakas ato

Etouez ar re brudeta dre o speret huel,  
Hac e goll a c'hlaçharo hac a dost hac a bell.

Da vèred eus a Vontmartr, er gêr eus a Baris,  
Ar c'haòn en deus en heuillet gant calz e guenvrois;  
An Autrou Brizeux var bez an Autrou GONIDEC  
En deus grèt ar melodi a dad ar Brezonec.

En eur renta d'an douar eno e wir vignon,  
An Autrou Brizeux neuze, glaçharet e galon,  
A deu, en eur hirvoudi, ha gant ur vouez tener  
Da brononç ar c'homzou-mâ var bez ar Breiziad ker:

« Ra deuy hor brô ker a Vreiz da glêvet hor c'heuziou,  
» Var ar c'holl bras ra hirio, a fraill hor c'halonou :  
» Unan demeus an nopl a douez e bugale  
» A renkomp, sioaz! hirio, gwelet disken er be!....

» Betek an deiz a vremâ n'en d'oe brassoc'h sourci  
» Nemet skrifa evit Breiz ha beva eviti.  
» Nan, biskoas ne voe gwelet, an oll en lavaro,  
» Un den ker gwiziek hac én e langach e vam-bro.

» Kenvroiz Autrou GONIDEC, c'houi a anav ervad  
» Petra voe e oad kenta : oll e voe deread.  
» Ganet voa e Conc-Leon, hac e kuittas ar gêr  
» Evit ober e studi e skolach Landreger.

## — 3 —

- » D'an oad eus a zeitek vloas, er revolution,  
 » En amzer eus a drubuill, a hirvoud, a spouron,  
 » Voe cunduet d'ar chaffot vit beza dibennet;  
 » Hogen vel dre ur miracl voe neuze savetet.
- » Mesket goude en tragaz, nespét d'e santimant,  
 » Forcet da vont d'en em goach, gwisket vel ur paysant,  
 » En em lakas da zeski eus hor bro al langach,  
 » Pehimi a gozee en e vugaleach.
- » Hac adalec an deiz-se e voe bepret c'hoantek  
 » Da skrifa meurbed reizus hon langach brezonec.  
 » En oll blaçou a zalc'has n'en devoa nep repos,  
 » Bepret eus ar Brezonec voa occupet deiz-nos.
- » Ha ni lezo e gorf paour amâ, pell deus e vro?  
 » Oh! nan.... Ni oll, Bretonet, gant soign a gemero  
 » Ar voyen ma vo rentet en e gêr Conc-Leon,  
 » Vit ma vo darempredet atao gant peb Breton.
- » Reketomp ma vo savet kerkent eno neuze  
 » Eur *Men-Hir*, evit diskeuz pelec'h e vo e ve;  
 » Peb Breziad a dle kaout c'hoant da zont, eus e voyen,  
 » Da zicour sevel ur bez da un hevelep den.
- » Ra deuyo ar Vretonet da gompren o dever,  
 » Ha ni, diskibien leal d'eur c'henvroad ken ker,



— 4 —

» Promettomp oll assambles, var ar bez-mâ stoùet,  
» Biken hano GONIDEC na vo ankounac'het. »

C'houi, e vignonet yaouank, oc'h eus bet an eür-vad  
Deus an Autrou GONIDEC alies da dostat,  
Autrounez a Vilmarque, ha c'houi, breudeur Courcy,  
De Léseleuc ha Brizeux, ha c'hoas meur a hini.

Cuntinuit da scrifa var hor bro ger a Vreiz;  
Oll e zoc'h disposet mad d'en ober gant calz reiz :  
Eur servich eus ar vrassa a rentoc'h d'hor mam-bro,  
Hac eur blijadur meurbed da guement ho lenno.

Meskit ivez ho taelou gant hon re, va breudeur,  
C'houi pere, pen diouzomp, so o chom e Breiz-Veur,  
Rentit hommach da vemor an Autrou GONIDEC,  
P'ini veldoc'h a garrie hon langach Brezonec.

*Eur Breiziad.*